

Ukiut qulit ingerlaneranni ilinniarfinni Iisimatusarfimmilu ilinniartitsisut ikinnerpaamik 80 %-iisa kalaallisut ilinniartitsisalernissaat anguniarlugu periarfissat suunerinik Naalakkersuisut misissuinissaat pillugu Inatsisartunut aalajangiiffigisassatut siunnersuut. Misissuineq UKA2022-mi saqqummiunneqassaaq.

(Inatsisartunut ilaasortaq Doris J. Jensen, Siumut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Ilinniarfinni Iisimatusarfimmilu ilinniartitsisut ukiut qulit ingerlaneranni ikinnerpaamik 80 %-iisa kalaallisut ilinniartitsisalernissaat anguniarlugu periarfissat suunerinik Naalakkersuisut misissuinissaat pillugu Inatsisartunut aalajangiiffigisassatut siunnersuutaanut Inatsisartunut ilaasortaq Doris J. Jensen Naalakkersuisut qutsavigerusuppaat.

Sapinngisamik amerlanerpaat ilitsoqqussaralugu oqaatsiminnik atugaqarlutik ilinniartitaasalernissaannik sulissuteqarnissatsinnik siunnersuuteqartoq Naalakkersuisut isumaqatigaat. Ilinniarfeqarfanni amerlasuuni kalaallit iliniartitsisut pissarsiarinissaannut sungiusarnissaannullu siunnerfeqartumik suliniartoqareerpoq. Naak siuariartorneq pilertornerusumik ingerlattariaqaripput tamatta isumaqatigiissutigisinnaagaluarlutigu, oqaatsivut atorlugit ilinniartitsisut amerliartuaarnerat takusinnaavarput.

Meeqqat atuarfianni ilinniartitsisut amerlanerit kalaallisut oqaatsivut atorlugit ilinniartitsinissamut piginnaaneqarput. Inuussutissarsiutinut ilinniartitaanermik ilinniarfinni arlaqartuni kalaallisut oqaatsit ilinniartitaanermi annertunerusumik atorneqartarput. Ingerlaqqiffiusumik ilinniarfinni GUX-imilu ilinniartitsinermi ilinniartitsisut kalaallisut piginnaasallit amigaataasorujussuupput. Ingerlaqqiffiusumik ilinniarfinni GUX-imilu ilinniartitsinermi ilinniartitsinissamut ingerlaqqiffiusumik ilinniagaqarsimanissaq piunasaqaataavoq, tamannalu ukiuni amerlasuuni ingerlattariaqartarpoq, sualummillu ingerlaqqiffiusumik ilinniareernermi suliffeqarfanni piunaneqartaqigamik amerlaqisunik allanik periarfissinneqartarput.

Ilinniagaqarfiutitsinni ilinniartitaanermi oqaatsitta atorneqarnissaasa malunnaatilimmik annertusarnissaanik pisariaqartitsineq Naalakkersuisut isumaqatigilluinnarpaat.

Iliuseqarnermi annertunerpaamik sunniuteqartitsiumalluni ilinniartitaanermi oqaatsit atugaanerisa annertusarnissaanut periaaseq ilinniarfinni tamani assigiinngisitaarsinnaammat peqatigisaanik nassuerutigisariaqarpoq.

Ilinniartitaanermi kalaallisut oqaatsit 80 %-imik atorneqalernissaannut ilinniarfiit ilai annertungaatsiartumik killiffeqarput, illuatungaatigulli ilinniartitaanerni allani ilinniartitsisut kalaallit oqaasiinik atuisinnaasut ikinnerusarlutik. Ilinniarfiit ilinniartitsinermi kalaallisut oqalussinnaasunik ikittuinnarnik ilinniartitsisullit, oqaatsitigut piginnaasalinnik

ilinniartitsisussarsiorsinnaanerminnik akuttunngitsumik annertuumik ajornartorsiorinneqartarput. Ilinniartitaanerit tamakku ukiut quliinnaat ingerlaneranni 80 %-imik angusaqarnissaminut ajornartorsiorsinnaapput.

Kalaallisut ilinniartitsisut amerlassusiat annertusiniarlugu suliniutit suut siuarsaataasinnaanersut annertunerusumik qulaajassallugu pissusissamisuussasooq siunnersuuteqartutulli Naalakkersuisut isumaqarput. Tamatuma kingorna taamatut misissueqqissaarneq siunnerfilimmik iliuusissatut pilersaarusiornissamat tunngaviusinnaassaaq. Taamaattorli ilinniarfinnut tamanut procenti aalajangersimasooq anguniassallugu tulluurtuussanngitsoq Naalakkersuisut isumaqarput. Misissuinermi ilinniarfinni ataasiakkaani assigiinngissutsit pisariaqartitallu aallaaviunissaat tulluurtuussasooq Naalakkersuisut isumaqarput, anguniagarlu tassaasariaqarpoq ilinniarfinni tamani ilinniartitsisut kalaallisut ilinniartitsisinnaasut piffissap aalajangersimasup ingerlanerani malunnaatilimmik amerleriarnissaat.

Tamanna tunngavigalugu Naalakkersuisut matumuuna imaattumik allannguutissatut siunnersuusiorput:

“Inatsisartut aalajangiiffigisassatut siunnersuut pillugu Naalakkersuisut misissueqquneqartut

"Ukiut qulit ingerlaneranni ilinniarfinni ilisimatusarfimmilu ilinniartitsisut malunnaatilimmik amerlanerusut kalaallisut ilinniartitsisalnissaat anguniarlugu periarfissat suunerinik Naalakkersuisut misissueqquneqarnerat pillugu Inatsisartunut aalajangiiffigisassatut siunnersuut. Misissuineq UKA2022-mi saqqummiunneqassaaq."